

■ FORUM

Adula – il grounding

La prognosa dalla opposiziun partenent la votaziun (Südosstschweiz 11-11-16): «Ils presidents vegnan a dir gie, il pievel na». Quella fuva sebasada sin la fidonza ella sauna raschun e cun tedlar il puls dalla populaziun. Tgi che ha respect dil suveran vegn era respectaus da quel. Presidents e lur clientellas politiseschan adina pli e pli sper la populaziun.

Fuss ei buca meglier sch'els mettesen giu il pievel ed elegessen in auter? Ni sch'els prendessen il receipt da Hämmerle: Ignorar las vischnauncas e far votar la confederaziun.

Land of Hope and Glory

Dapi che Leuthard era sgulada a Cuera, contrahau davos escha serrada e schau communicar ch'il discurs seigi staus constructiv e cunzun dapi la radunonza da Sumvitg, fuva il project Adula giun plaun. La tezla da 73% na era strusch pusseviva da cuntchar. Che sis dil Parc sevevan da quella radunonza davontier en sala, sepinai cun lur video, ha il suveran buc acceptau. Memia fetg fuva vegniu unificau cun propaganda. Il na da Sumvitg, provocau dil president communal cul gerau la cuscha, ei stau in nausch omen.

Val ha reagiu cun organisar in'atgna sera, nua che Decurtins ei aunc inagada staus si per dir ch'el seigi ex-mistral e cuss. naz. cass e ch'el hagi udiu, citat: «questa sera nuot auter che negativ». Emblidau da dir veva el ch'el seigi staus quel che hagi impediù il plaz da golf a Trun. Aber Val fuva einawägg buca si per tedlar giu Walter ed ha decidiu in'jamna pli tard cun 81% na pil Riiwaldhoora enstagl digl Adula. Quella decisiun sparteva ussa la zona centrala en dus tocs e deva liber in cugn tochen al péz dil Valrein. Senza Val era Adula torso. Igl orchester denton sunava «Land of Hope and Glory» sil palancau inclinau dalla nav. Cunquei ch'ei era clar tgei che Vrin voteschi (pli datier dil cuolm e pli pauc meraviglias da parcs), veva l'opposiziun mess sin la strategia da schar dalla vart Mustér culla claustra e Trun cul clan, da schar rotar il gerau da Sumvitg cun bostitsch e tuortalinas tuatschinas e fatg giu da seconcentrar sin Medel e Blegn.



Neblas stgiras sur il Parc Adula MAD

Eleven twenty seven

Lu la dumengia 11-27 allas 10.41 igl SMS, la sorpresa che ha scadenau tuts ord las soccas: Medel di NA, effectuau pervia d'in inserat (exploraziun d'aur ella zona dil parc, publicada el Fegl ufficial dils 18-11). Silsuenter ha ei mo entschiet a sbalunar butteglas e sutgas dalla punt titanica vi, e sil clom «Ellas barcas» ha igl orchester runau ses instruments viers backbord e scadenava «Nearer My God To Thee». Cu Mustér-Vitg ei aunc sebens vi tier ses uclauns fuva nuot pli claustra, il GAU programmaus. Blenio eran nus segirs ch'ei tarmettjen in na a Roveredo e cu quei da Serravalle ei vegniu ora veva il comite gia svidau ina Château de Lacquy. – Parc Adula che veva piars il terren tochen Biasca ha interpretau las cefras sin sia moda: mo per 124 vuschs seigi il project vegnius fiers. La realitad ei che tut las vischnauncas dil nord han fiers il construct orembora e che mo Trun steva aunc leu cun resgiau giu las caultschas. Nus vein schau vegnir endamen ladinamein il Faust, nosa lectura duront la campagna: «Von Norden dringt der scharfe Geisterzahn / Auf dich herbei, mit pfeilgespitzten Zungen». 16 onns e 10 milliuns, tgei lavur ei quei stau, sche treis chischlets dad opponents, menai dad in capo ch'ei aunc ius denteren 15 dis a Cuba en vacanzas, derschun in tal project cun 9345.75 francs en dus meins

cun far ina sesida? (Atgnamein duas, denton tier l'emprema eran ils Grischuns buca vegni: Ei era catscha.)

L'analisa

La tema dils promoturs, ch'il suveran diti na, ha bloccau els daditg; la votaziun ei vegnida tratga alla liunga. Il suveran ei buca vegnius ord il smarvegl co quella glicud prolungeva a sesezza las piazzas, teneva a cauld ses fans cun sponsoring («Sie stellen wie vom Himmel sich gesandt, / Und lispeln englisch, wenn sie lügen.» Goethe: Faust). Vilentaus da survegner semper mo mesas rispostas veva il votant fatg siu meini. Ils promoturs han sminau quei, piars la gnarva, entschiet a manipular cefras ella charta ed a parter ora mams a Mustér, tustgets a Sumvitg e talers a Trun. La populaziun aber ha sentiu che zatgei seigi buca schuber. Cu RTR ha entschiet a mussar x gadas la miracla da Berchtesgaden, ferton che la regenza ha puntuau ch'ella semischedi buc ella campagna, suenter che Parolini, Jäger e Cavigelli vevan ludau il parc sil film dalle seras d'«informaziun», ha tut l'aua entschiet ad ir sil mulin falliu.

In currier nordic da Trun – sponsor Adula lai salidar –, perschadius che nus funcziunin mo cun sevender e cun subvenziuns, ha giu raschun da dir: «Mo tgi che ha buca tema sa era gudignar.» En

tuttacass han ils paucs giu tema ed ils paucs cartiu la parola sin banderola nera che Parc Adula seigi decisiv per nies avegnir. Co leva zatgi, che ei en 16 onns buca vegnius cun ina suletta innovaziun, ir cun nus el futur? En la parola u Adula ni Apocalipsa veva sobiso negin cartiu. Subvenziuns per star da cumpignia, per far mirs, per rugalar sontgets e per biotops e lags «naturals» vegnan era dad auras instituziuns. Ulteriurs motivs che han sfundrau il project ei stada la tactica isada da far sin progressiv ed innovativ e metter giu tut tschels sco populists. Enstagl da perschader, ha Parc Adula empuau da cumprar. Il siatavel punct ei la credibilitad stada: Salvar la piazza da panzers e schar dalla vart la Curciusa. Il pievel, schevan ils vegls, ei buc in sgnap. Che l'idea dil parc vegni da sutsi ha negin cartiu. Da sutsi ei la votaziun vegnida. Aber gnanc quella ei vegnida prida seria. Cun arroganza ha Pro Natura commentau il resultat sco da ver gudignau, e schon la dumengia dil fiasco han ils promoturs ignorau il suveran e semiau d'in parc el sid, culla visiun da salvar lur piazzas.

Ina veglia regla ell'antica averteva ils victurs da respectar ils victorisai. Aber co far quei, sche quels ein aunc adina dalla perschasiun ch'els seignen quels che hagian gudignau? Leo Tuor, Val Sumvitg

Na al Parc Adula periclitescha projects turistics existents

■ (rtr) Pervia dal na al Parc Adula è er il project «Sendas culturalas Parc Adula» periclità, in project per promover il turissem cun sendas da viandar culturalas. Il project «Sendas culturalas Parc Adula» è (u era) in project comunabel dal svilupader regional da la Surselva ed il Parc Adula. La finamira dal project è da promover il turissem da viandar cun renovar e promover sendas che mainan dal nord en il sid tras l'anterior territori dal Parc Adula.

En in emprim pass duain las sendas vegnir restauradas e messas en urden. Silsuenter duai vegnir fatg reclama per las sendas cun attracziuns per lung da las sendas. En Val Lumnezia fissan quai p. ex. las baselgas e chapluttas, dentant era specialitads culinarias u istoricas pudessan uschia vegnir promovidas.

Trais onns lavur per nagut?

Ils custs totals dal project muntan tenor il svilupader regional *Urs Giezendanner* a bunamain in milliun francs. Il Parc Adula avess surpiglià 400 000 francs. Tgi che pudess surpigliar la cumpart dal parc na sa Giezendanner anc betg.

Organisaziuns sco l'Agid svizzer per la muntogna ASM ed auters sponsurs sajan gia da la partida. Uss stoppia el guardar cun il chantun co els possian segirar la finanziaziun.

Pitschens projects culturals han in problem

In problem vesa Giezendanner era per pitschens projects culturals che n'hajan betg per finamira principala da promover l'economia. Tals projects n'èn betg chausa dal svilupader regional che sto sa concentrar sin projects economics. Il Parc Adula fiss stà in fitg bun partenari per projects culturals. Perquai quinta Giezendanner era cun daplì dumondas per sustegn finanziel d'inizians da tals projects. Il sulet ch'el possia dentant far en in tal cas saja da dar vinavant adressas e numers da telefon da fundaziuns e potenzials sponsurs.

Ier aunc cun fatscha rienta – ed oz?

Annunzia da morts

Consterni e cun gronda dolor prendein nus comiau da miu car consort, da nies carissim bab e tat e da nies frar e quinau

Bruno Casanova-Keller

13-10-1942 – 6-12-2016

Entras in accident tragic eis el vegnius stratgs nunspitgadamein ord nies miez. Nus essan fetg trests e ti mauncas a nus.

Adressa da malencurada:

Ursula Casanova
Dado Baselgia 38
7149 Vrin

Las famiglias en malencurada:

Ursula Casanova-Keller, consorta
Anja Casanova, feglia
Michael und Stefanie Casanova cun Silas e Quirina, fegl
Fargliuns cun famiglias e parents

La sepultura ha liug la sonda, ils 10 da december 2016 allas 13.30 en baselgia catolica a Vrin.



Mias forzas ein a fin
Segner, pren mei en Tes mauns
(an)

Annunzia da mort

Felix Candinas

1 d'uost 1922 – 2 da december 2016

Suenter cuorta, greva malsogna e suenter ina veta cumplenida eis el sedurmentaus el ravugl dils ses. Nus essan trests, denton engrazievvels ch'el ei staus cun nus.

Adressa da malencurada:

Ursin Candinas
Piadras 14
7156 Rueun

En tgeua tristezia:

Maria Ursula Candinas-Cadruvi, quinada
nevs e niazas:
Gianna, Luis, Martial, Silvia, Patricia ed Ursin
cun famiglias
Reto, Donat, Bruno, Claudio e Daniel cun famiglias
sco era figliols e ulterius parents ed enconuschents

La sepultura ha liug sonda, ils 10-12-2016 allas 14.00 a Rueun en baselgia parochiala. L'urna secatta en baselgia la sonda naven dallas 11.00.

Engraziament

Cun questa caschun vulessan nus engraziar cordialmein;

- al persunal dalla casa da vegls e da tgira a Glion per l'excellenta tgira ed accumpignament
- als medis da casa dr. A. Poltera e dr. B. Grimm per la buna tgira medicinala.
- A tuttas persunas che han fatg dil bien a nies car aug Felix duront sia veta ed accumpignau el sin siu davos viadi terrestre.

Uschè fitg ha Dieus charezzà il mund, ch'el ha dà
nà ses unic Figl, sinaquei che scadin che crai en El
na giaia betg a perder, mabain haja vita perpetna